



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 412
fax. +387 33 726 414
e – mail: info@voda.ba

Broj: **UP-1/21-1-40-307-3/23**
Datum: **07.08.2023. godine**

«Agencija za vodno područje rijeke Save» Sarajevo (u daljem tekstu Agencija) rješavajući po zahtjevu Agencije podnesenom putem „Sektora za realizaciju investicionih projekata“ za izdavanje prethodne vodne saglasnosti za uređenje korita rijeke Vrbas na lokacijama 4, 5, 6, 7, 8 i 9 u općini Bugojno, na osnovu člana 109. stav (1) tačka 14. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 49/99 i 61/22), **donosi**

RJEŠENJE **o prethodnoj vodnoj saglasnosti**

1. Investitoru, «Agenciji za vodno područje rijeke Save» Sarajevo, daje se prethodna vodna saglasnost za uređenje erodabilnih obala i čišćenje korita rijeke Vrbas, na području općine Bugojno, na lokacijama 4, 5, 6, 7, 8 i 9, u postupku pribavljanja urbanističke saglasnosti.
2. Prethodna vodna saglasnost se daje na osnovu pregleda projektne i druge dokumentacije dostavljene od strane podnosioca zahtjeva i pod slijedećim uslovima:
 - 2.1. Izraditi i revidovati investiciono - tehničku dokumentaciju na nivou potrebnom za pribavljanje odobrenja za građenje u skladu sa propisima koji važe za ovu vrstu radova, a koja treba da je urađena od strane ovlaštenog pravnog lica u skladu sa odredbama Pravilnika o uvjetima i kriterijima koje mora ispunjavati pravno lice za izradu dokumentacije na osnovu koje se izdaju vodni akti («Službene novine Federacije BiH», broj 17/08 i 38/12).
 - 2.2. Projektnom dokumentacijom treba da se obuhvati tehničko rješenje zaštite erodabilnih obala korita i čišćenje korita u cilju sprječavanja/umanjenja štetnog djelovanja voda i poboljšanja hidromorfološkog stanja vodotoka i dinamike prirodnog procesa tečenja na predmetnim lokalitetima, a projekat između ostalog treba sadržavati:
 - Situativni prikaz sa ucrtanim dionicama na kojima se planiraju aktivnosti na uređenju obala rijeke Vrbas na ažurnim geodetskim podlogama. Priložiti uzdužne i poprečne profile riječnog korita urađene na bazi geodetskih snimanja, a koja će se provesti za potrebe izrade ove projektne dokumentacije. Snimanje izvesti preko operativnog poligonog vlaka uz povezivanje sa državnim nivelmanom sa osiguranjem krajnjih tačaka poprečnih profila na terenu trajnim biljegama (uz položajni opis i nacrt), preko kojih će se vršiti kontrola realizacije ovih radova.
 - Tehnički opis uz obrazloženje rješenja i pojašnjenje efekata izgradnje zaštitnih objekata, dimenzioniranje obloge konkavnih krivina rijeke Vrbas, predmjer radova, tehničke uslove izvođenja i odgovarajuće grafičke priloge uobičajene za nivo projekta za građenje sa ciljem uređenja i sprječavanja dalje devastacije obala rijeke Vrbas, na predmetnim lokacijama;
 - Rješenje kojim će se očistiti i urediti korito rijeke Vrbas na navedenoj dionici u cilju stabilizacije obala, korita i smanjenje rizika od štetnog djelovanja voda na predmetno područje;
 - Zahvati na čišćenju korita i sanaciji obala korita moraju uvažiti postojeće imovinsko - pravne odnose i radove svesti u pojas kojim će se najmanje narušiti privatni posjedi i parcele;
 - Predmjerom radova utvrditi količine materijala (pijesak, šljunak) koje će se izvaditi iz ada/sprudišta, a koji se može iskoristiti za radove na uređenju korita i obala rijeke Vrbas, te materijala koji treba ukloniti (smeće, mulj, kruti otpad, pijesak, šljunak, šiblje i dr). Bilans masa uraditi na osnovu ažurnih geodetskih podloga;
 - Zahvati uređenja korita trebaju se uklopiti u postojeći ambijent sa minimalnim narušavanjem prirodnog stanja koristeći u rješenju prirodne materijale;
 - Trebaju se uvažiti zahtjevi predstavnika jedinice lokalne samouprave u dijelu koji se odnosi na uklapanje u urbanističku i prostorno – plansku dokumentaciju;

- Prilikom definiranja načina izvođenja radova na utvrđenim lokalitetima sa oštećenjima obale korita uvažiti postojeće stanje korita, morfologiju terena, geološki sastav korita i sl.;
- Projektna dokumentacija treba da bude urađena na zakonski zahtijevanom nivou za ovu vrstu radova i sadrži sve opće i tehničke elemente propisane zakonodavstvom iz ove oblasti.
3. Materijal koji ima svoju upotrebnu i tržišnu vrijednost i koji se može dalje koristiti (pijesak, šljunak) koji će se pojaviti kod čišćenja korita rijeke Vrbas i čije će se količine utvrditi u predmjeru radova iz tačke 2.2. alineja 5 ovog dispozitiva, treba obuhvatiti Ugovorom u skladu sa odredbama člana 19. stav (2) i (3) Uredbe o načinu dodjele prava za vađenje materijala iz vodotoka («Službene novine FBiH», broj 58/15).
 4. Po izradi dokumentacije iz tačke 2.1. dispozitiva ovog Rješenja, nosilac prava iz prethodne vodne saglasnosti dužan je da ovoj Agenciji podnese zahtjev za izdavanje vodne saglasnosti. Zahtjev za izdavanje vodne saglasnosti dostavlja se u skladu sa članom 8. i 19. Pravilnika o sadržaju, obliku, uslovima, načinu izdavanja i čuvanja vodnih akata.
- Uz zahtjev se, između ostalog, prilaže:
- Investiciono - tehnička dokumentacija zahtijevana tačkom 2.1. ovog Rješenja,
 - Rješenje o urbanističkoj saglasnosti i okolinskoj dozvoli (ukoliko predmetna aktivnost podliježe obavezi pribavljanja iste) za predmetnu dionicu uređenja rijeke i dokaz o riješenim imovinsko – pravnim odnosima,
 - Saglasnost udruženja sportskih ribolovaca na termine provođenja radova na predmetnom uređenju korita rijeke Vrbas.
5. Ukoliko nakon izdavanja prethodne vodne saglasnosti, a u toku pripreme dokumentacije za podnošenje zahtjeva za izdavanje vodne saglasnosti, u roku utvrđenom u članu 111. stav 3. Zakona, nastupe okolnosti za koje se može pretpostaviti da mogu biti od uticaja na rješavanje zahtjeva za donošenje rješenja o vodnoj saglasnosti, nosilac prava iz prethodne vodne saglasnosti dužan je o nastanku tih okolnosti obavjestiti ovu agenciju, prije podnošenja zahtjeva, odnosno obavezno navesti okolnosti u zahtjevu za izdavanje vodne saglasnosti.
 6. Ovu prethodnu vodnu saglasnost će Investitor koristiti u postupku dobijanja urbanističke saglasnosti i okolinske dozvole ukoliko ova vrsta radova podliježe obavezi ishodovanja istih i ona definiše uslove koje projektna dokumentacija treba zadovoljiti sa aspekta voda u skladu sa Zakonom o vodama u postupku dobijanja vodne saglasnosti.
 7. Prethodna vodna saglasnost se daje sa rokom važenja od tri (3) godine od dana pravosnažnosti ovog rješenja.

O B R A Z L O Ž E N J E

Investitor, «Agencija za vodno područje rijeke Save» Sarajevo, putem "Sektora za realizaciju investicionih projekata" je podnio zahtjev za izdavanje prethodne vodne saglasnosti za uređenje erodabilnih obala i čišćenje korita u cilju obezbjeđenja proticajnog profila korita rijeke Vrbas, na lokacijama 4, 5, 6, 7, 8 i 9, na području općine Bugojno.

Uz zahtjev je dostavljena i pregledana slijedeća dokumentacija:

- Kopija Aktuelnog izvoda iz sudskog registra Općinskog suda u Sarajevu, broj: 065-0-RegZ-14-002716 od 21.04.2014. godine izdato od strane Općinskog suda u Sarajevu,
- Kopija obavještenja o razvrstavanju pravnog lica prema klasifikaciji djelatnosti, broj: 07-32.5-45391/12 od 11.12.2012. godine, služba za statistiku za područje Kantona Sarajevo,
- Kopija uvjerenja o poreznoj registraciji, Porezna uprava FBiH - Kantonalni porezni ured Sarajevo, od 14.12.2012. godine,
- Kopija Rješenja o urbanističkoj saglasnosti broj: 05-23-00147-20 od 20.03.2020. godine, sa rokom važenja od jedne godine,
- Kopija Izjave o riješenim imovinsko – pravnim odnosima od 30.03.2020. godine, Općina Bugojno,
- Saglasnost SRD Bugojno broj 03/02/20 od 27.02.2020. godine, kopija,
- Glavni projekat „Uređenje korita rijeke Vrbas u Bugojnu na 9 lokacija ukupne dužine 16,2 km“, urađen od strane „Higracon“ d.o.o. Sarajevo, septembar 2019. godine.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 124. stav (1) Zakona o vodama i člana 21. Pravilnika o sadržaju, obliku, uslovima, načinu izdavanja i čuvanja vodnih akata o zahtjevu je dana 02.08.2023. godine obaviještena javnost putem obavještenja na oglasnoj ploči Agencije i u dnevnim novinama „OSLOBOĐENJE“. U datom roku nije bilo pisanih izjašnjenja o predloženim aktivnostima iz zahtjeva.

Na osnovu utvrđenog činjeničnog stanja i dostavljene dokumentacije, a u svrhu smanjenja negativnih uticaja predmetne aktivnosti na režim voda i prava na vode dodijeljena drugim korisnicima, podnosiocu zahtjeva su ovim vodnim aktom, u tački 2. dispozitiva rješenja, shodno odredbama Zakona o vodama i odredbama Pravilnika o sadržaju, obliku, uslovima, načinu izdavanja i čuvanja vodnih akata, propisani uslovi koje je Investitor dužan ispuniti prilikom izrade projektne dokumentacije koja će Investitoru biti potrebna u postupku pribavljanja vodne saglasnosti.

U provedenom postupku konstatovano je slijedeće:

- Aktivnost za koju je podnesen zahtjev za izdavanje prethodne vodne saglasnosti je uređenje/stabilizacija obala korita rijeke Vrbas na lokacijama 4, 5, 6, 7, 8 i 9 (prema oznakama iz priložene projektne dokumentacije), na području općine Bugojno.
- U proteklom periodu su realizovani radovi na lokacijama 1,2, i 3.
- Izgradnjom regulacije rijeke Vrbas na predmetnoj dionici obezbjeđuje se stabilizacije obala, korita i smanjenje rizika od štetnog djelovanja voda.

Predmetna aktivnost obrađena je projektnom dokumentacijom: Glavni projekat „Uređenje korita rijeke Vrbas u Bugojnu na 9 lokacija ukupne dužine 16,2 km“, urađen od strane „Higracon“ d.o.o. Sarajevo, septembar 2019. godine.

Navedena aktivnost je planirana važećim Planom i finansijskim planom za 2023. godinu AVP Sava, pod oznakom C.2.6.

Na osnovu priložene tehničke dokumentacije utvrđeno je da se u svrhu poboljšanja hidromorfološkog stanja vodotoka, dinamike prirodnog procesa tečenja i smanjenja opasnosti od nastanka šteta od poplava i šteta nastalih erozivnim procesima na predmetnoj dionici, na osnovu člana 109. stav (1) tačka 14., a u vezi sa članom 111. Zakona o vodama («Službene novine FBiH», broj 70/06) i člana 17., stav (1), tačka 13. Pravilnika o sadržaju, obliku, uvjetima, načinu izdavanja i čuvanja vodnih akata («Službene novine Federacije BiH» broj 31/15, 55/19, 41/20 i 63/22), valjalo riješiti kao u dispozitivu ovog rješenja.

UPUTA O PRAVNOM LIJEKU:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema rješenja. Žalba se podnosi neposredno pismeno ili preporučeno putem pošte ovom organu i taksira se sa 15,0 KM administrativne takse, prema tarifnom broju 3. Tarife Federalnih administrativnih taksi.

Voditelj postupka

Nihad Pezo, dipl.inž.građ.

Prilog:

Glavni projekat „Uređenje korita rijeke Vrbas u Bugojnu na 9 lokacija ukupne dužine 16,2 km“, urađen od strane „Higracon“ d.o.o. Sarajevo, septembar 2019. godine.

Po ovlaštenju
Rukovodilac sektora za izdavanje
vodnih akata



Haris Alisehović, dipl.inž.građ.

Dostaviti:

- «Agencija za vodno područje rijeke Save», Sektor 30 (Prilog);
- AVP Sava, ISV-vodna knjiga – ovdje;
- ☞ Arhiva – ovdje;
- AVP Sava – Oglasna ploča